

Uunga siunnersuut: Naalakkersuinikkut arlaannaannulluunniit attuumassuteqanngitsunik siunnersuisoqatigiinnik pilersitsisinnaaneq pillugu UKA2014-imut nassuiaasioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Siunnersuisoqatigiit aatsitassarsiornermi aningaasaliisartut sanngisuussusiat aningaasaliisussarsiornermullu pilersaarutaat pillugit inassuteqaasiortassapput, pilersaarutit aalajangersimasut sanngisuussusiat pillugu paasissutissiisassallutik kiisalu aatsitassarsiornermi pilersaarutit ataasiakkaat siunissaq ungasinnerusoq eqqarsaatigalugu piujuartitsineq tunggavigalugu inuiaqatigiinni ineriartortitsinermik nassataqarnissaat siuarsaaqataaffigissallugu. Tamanna pillugu siunnersuisoqatigiit Naalakkersuisunut innuttaasunullu inassuteqaasiortassapput. Siunnersuisoqatigiit katitigaanerat, akissarsiaat pisinnaatitaanerilu pillugit ilutsit periarfissaasinnaasut nassuiaammi ilanngullugit nalilersorneqassapput.

(Inatsisartunut ilaasortat Naaja H. Nathanielsen aamma Sara Olsvig, Inuit Ataqatigiit)

pillugu

Aatsitassanut Ataatsimiititaliap

ISUMALIUTISSIISUTAA

Siunnersuutip aappassaaneernejarnani saqqummiunneqartoq

Ataatsimiititaliaq suliarinninnermini ukuninnga inuttaqarpoq:

Doris Jakobsen	(S)	siulittaasup tullia
Saxtorph Didriksen	(S)	sinniisoq
Per Berthelsen	(S)	sinniisoq
Agathe Fontain	(IA)	
Naaja Nathanielsen	(IA)	
Kalstat Lund	(IA)	
Evelyn Frederiksen	(S)	sinniisoq

UPA2014-imi siullermeerinninnerup kingorna ataatsimiititaliap siunnersuut misissorpaa isumaliutigisanilu Inatsisartunut matumuuna nassiullugit.

1. Siunnersuutip imarisaa siunertaalu.

Aningaasaliisinnaasut sanngisuussusiat aningaasaliinissamillu pilersaarutaat pillugit misissueqqissaarsinnaallutillu kaammattuuteqarsinnaasunik siunnersuisoqatigiinnik naalakkersuinikkut arlaannaannulluunniit attuumassuteqanngitsunik pilersitsinissamut

periarfissanut erseqqissaataasumik UKA14-imut **nassuiaasiortoqarnissaa** siunnersuuteqartup kissaatigaa. Aammattaaq siunnersuisoqatigiinnik pilersitsisinnanermi aningaasaqarnikkut isumagisassatigullu isiginiagassat nassuiaammi nalilersorneqassapput.

Siunnersuutip sukumiinerusumik sammilinnginnerani Naalakkersuisut akissuteqaataat tungavigalugu taasissutissap teknikikkut imarisaa ataatsimiititaliamit qanoq paasineqarnerisq pillugu erseqqissaanissaq ataatsimiititaliamit pingaartinneqarpoq. Naalakkersuisut akissuteqaamminni ima oqarput:

”Aatsitassarsiornermi aningaasaliisartut sanngisuussusiat aningaasaliisussarsiornermullu pilersaarutaat pillugit Naalakkersuinikkut arlaannaannulluunniit attuumassuteqanngitsumik pilersitsinissaq pillugu siunnersuut aatsitassanut inatsimmi toqqammaviusutut tungaviit ilaannik kipititsissaaq, taamaalillunilu aatsitassarsiornermi politikki aalajaassutsimut tutsuiginassutsimullu tunngatillugu kukkulluinnartumik nalunaaruteqassalluni:”

Aalajangiiffigisassatut siunnersuut manna Inatsisartunit akuersissutigineqassappat tamanna siunnersuisoqatigiinnik naalakkersuinikkut arlaannaannulluunniit attuumassuteqanngitsunik pilersitsinermik **kinguneQASSANNILAQ.** Aalajangiiffigisassatut siunnersuut akuerineqassappat tamatuma **taamaallaat kingunerissavaa** siunnersuisoqatigiinnik naalakkersuinikkut arlaannaannulluunniit attuumassuteqanngitsunik pilersitsisinnaaneq pillugu **UKA14-imut nassuiaasioqqullugit** Naalakkersuisut peqquneqassammata.

Taamatut pisariaqavissumik immikkoortitsinissaq akissuteqaammi annertunerusumik ingerlanneqanngilaq. Akerlianik qulequttat tungavilersuutillu akissuteqaammi sammineqarput siunnersuisoqatigiinnik taamaattunik pilersitsinissamik Naalakkersuisut peqquneqarnissaannik aalajangiiffigisassatut siunnersuummut sammitinneqartut paasineqarsinnaasut. Aalajangiiffigisassatulli siunnersuutip matuma tamanna **siunertarinngilluinnarpaa.**

Aalajangiiffigisassatut siunnersuutip matuma taasissutissartaani Naalakkersuisut qanorpiaq peqquneqarnerannik eqqortumik paasinnineq tungavigalugu Inatsisartut aalajangiiffigisassaattut siunnersuummut matumunnga naalakkersuinikkut naliliinissaat ataatsimiititaliamit pisariaqavissutut isigineqarpoq.

Siunnersuutip Inatsisartuni siullermeerneqarnera

Siunnersuutip siullermeerneqarnerani siunnersuummi siunertarineqartut piviusunngortinneqarnissaat partiinit arlalinnit akuersaartumik pissuseqarfigineqarpoq.

2. Ataatsimiititaliap siunnersuummik suliarinninnera

Suliassanik siunnersuisoqatigiinnit taamaattunit ingerlanneqarsinnaasutut siunnersuuteqartunit takorloorneqartunik ingerlataqartussanik siunnersuisoqatigiinnik naalackersuinikkut arlaannaannulluunniit attuumassuteqanngitsunik pilersitsinissaq Naalackersuisut akissuteqaamminni oqaatsit sakkortungaatsiartut atorlugit akerlileraat ataatsimiititaliamit oqaatigineqassaaq. Tassunga atatillugu isummersuutit siunnersuutip imarisaata ataani oqaatigisani ataatsimiititaliap inersuussutigiinnassavai aammalu siusinnerusukkut oqaatigineqartutulli aalajangiiffigisassatut siunnersuutip matuma akuerineqarnera siunnersuisoqatigiinnik naalackersuinikkut arlaannaannulluunniit attuumassuteqanngitsunik pilersitsinermik kinguneqassanngilaq. Taamaattumik tassunga atatillugu Naalackersuisut tunngavilersuutaat aalajangiiffigisassatut siunnersuummi siunertarivinneqartumut, tassalu nassuiaasiortoqarnissaanut attuumassuteqanngitsutut oqaatigineqartariaqarlutik.

Tamatuma saniatigut akissuteqaammi immikkoortut ilaanni tunngavilersuutit naammagittaanniutaannartut ilaatigullu pasisaarutitut paasineqarsinnaasutut isikkoqarput, tassunga ilanngullugu siunnersuisoqatigiinnik naalackersuinikkut arlaannaannulluunniit attuumassuteqanngitsunik pilersitsinnaanerup isumaqatissarsiortarnermut ileqqorlunnikkullu iluanaarniarnermut immikkut atorluarniarneqarsinnaaneramik tunngavilersuut. Siunnersuisoqatigiinnik arlaannaannulluunniit attuumassuteqanngitsunik Kalaallit Nunaata maannamut misilittagai isumaqatissarsiortarnerup ileqqorlunnikkullu iluanaarniarnerp suarsarneqarnerannut peqataaqataasimasut takussutissaqanngilaq, tassani ilaatigut eqqarsaatigineqarput Kalaallit Nunaanni Aningaasaqarnermut Siunnersuisoqatigiit, Aalisarnermut Siunnersuisoqatigiit, Imigassaq Ikiaroorartullu pillugit Siunnersuisoqatigiit il.il.

Oqaaseqaatinut tunngavigineqartut sukumiisumik misissoqqaarnagit inatsisilerinikkullu nalilersoqqaarnagit taama sakkortutigisumik inerniliinissaq mianersuunneqartariaqartoq ataatsimiititaliaq isumaqarpoq. Tamatuma saniatigut Australiami, Canadami Norgimilu siunnersuisoqatigiit naalackersuinikkut arlaannaannulluunniit attuumassuteqanngitsut nunani pineqartuni aatsitassarsiornikkut isumaqatissarsiortarnermut ileqqorlunnikkullu iluanaarniarnermut siuarsaaqataasimasinnaanerat ataatsimiititaliamit qularineqarpoq.

Aatsitassarsiornermi aalajangiinissamut pisinnaatitaassutsinik oqartussaaffinnilluunniit pisortatigoortunik siunnersuisoqatigiinnut naalackersuinikkut arlaannaannulluunniit attuumassuteqanngitsunut Naalackersuisut tunniussinissaannik kissaateqarnermik aalajangiiffigisassatut siunnersuutip taasissutissartaa tunngavilersuutitaaluunniit imaqarsorinangilaq. Siunnersuisoqatigiit suliassaat pillugit eqqarsaatit taasissutissami siunnersuuteqartunit allaaserineqartut sammisaaq pillugu nassuiaasiortoqassappat suliakkiummut tapiliussassatut isigineqarsinnaapput.

Siunnersuisoqatigiit naalackersuinikkut arlaannaannulluunniit attuumassuteqanngitsut nunatsinni siunissami pilersinneqassagaluarpata siunnersuisoqatigiit suleriaasissaasa pisinnaatitaanerisalu peqqissaarluinnartumik isumaliutigineqarnissaat soorunami pingaaruteqarpoq. Inatsisilerinermut aaqqissuussaannernullu isumaliutigisat tamakku sammisaq pillugu nassuiaataajumaartumi ilanngunneqarnissaat pissusissamisuusaaq.

Taamaattumik nassuiaasiornissami sinaakkutissat qanoq nassuiarneqarsinnaanersut Naalackersuisut akissuteqaamminni isummerfigisimanngimmassuk, taarsiulluguluunniit aalajangiiffigisassatut siunnersuummi allassimasutut nassuiaasiortoqarnissaa soq kissaatigineqannginnersoq isummerfigisimanngimmassuk tunngavilersorsimanngimmassul- luunniit naammangilaq.

Siunnersuutip imarisaanik aammalu Naalackersuisut tunngavilersuutitut saqqummiussaannik naliliinini ataatsimiititaliap maanna naammassivaa. Taamaattumillu siunnersuummut naalakkessuinikkut inassuteqaatini ataatsimiititaliap saqqummiutissavai.

3. Siunnersuutip aningaasaqarnikkut kingunerisassai

Aalajangiiffigisassatut siunnersuutip piviusunngortinneqarnerani aningaasaqarnikkut allaffissornikkullu kingunerisassat siunnersuutip tunngavilersuutitaani nassuiaatigineqartassasut Inatsisartut Suleriaasianni § 33, imm. 1-imi allassimavoq. Siunnersuutip aningaasaqarnikkut kingunerisassai naammaginartumik oqaatigineqartut ataatsimiititaliamit maluginiarneqarpoq.

4. Ataatsimiititaliap inassuteqaatai


Ataatsimiititaliami amerlanerussuteqartut Siumumeersut siunnersuut itigartinneqassasoq inassutigaaq.

Ataatsimiititaliami ikinnerussuteqartut Inuit Ataqtigiiinneersut siunnersuut akuerineqassasoq inassutigaaq siunnersuullu pillugu ima oqaaseqarumallutik:

Siunnersuut naalackersuisooqatigiinnit itigartinneqarmat Inuit Ataqtigiiinnit assut tupigusuutigineqarpoq, pineqartormi tassatuaammat nassuiaat. Tupaallaatigaarput aatsitassarsiornermut tunngasut pillugit siunnersuisoqatigiit arlaannaannulluunniit attuumassuteqanngitsut naalackersuisooqatigiinnit ima akerlerineqartigimmata allaat taanna pillugu nassuiaasiornissaq kissaatigineqarani. Aatsitassarsiornermik suliniutit aalajangersimasut siunnersuisoqatigiinnit arlaannaannulluunniit attuumassuteqanngitsunit nalilerneqartarnissaannik akuersaarnissap naalackersuisooqatigiinnit akerlilerneqarnera aamma assut tupaallaatigaarput. Aamma tupaallaatigaarput Atassut siunnersuummut

akuersaartumik pissuteqariarluni isummaminik allanngortitsilluni maanna itigartitsiniarmat. Naalackersuisooqatigiit akornanni nukittussutsip qanoq inneranik tamanna takutitsivoq aammalu immikkut ilisimasalinnit avataaneersunit siunnersorneqarnissamut immaqalu isornartorsiorneqarnissamut naalackersuisooqatigiit akerlilersuinerannik takutitsivoq. Taamaattoqarnera isumakulunnarlunilu naalackersuineramik aqutseriaasiuvoq uggornartoq. Naalackersuisooqatigiit siunnersorneqarnissamut innuttaasunillu peqataatitsinissamut ammanerunissaat naatsorsuutigigaluarparput, tamannali naalackersuisooqatigiinnissamik isumaqatigiisummi oqarluartaarneruinnarsimasorinarpoq.


Taama oqaaseqarluni isumaliutissiissummilu allassimasutut paasinnilluni ataatsimiittitaliap siunnersuut aappassaaniigassanngortippaa.



Doris Jakobsen
Siulittaasup tullia




Evelyn Frederiksen



Saxtorph Didriksen




Per Berthelsen



Agathe Fontain



Naaja Nathanielsen



Kalistat Lund